

Komunikadu Imprensa
Embaixada Japaun no PARCIC Realiza Workshop kona-bá
Arranju Ai-funan Japaun nian "IKEBANA" hodi Promove Ai-funan Lokál sira

Dili, 8 Outubru 2024 – Embaixada Japaun nian iha Timor-Leste no PARCIC, ONG Japaun nian, hala'o workshop ida kona-ba Arranju Ai-funan Japaun nian ho naran "IKEBANA" ba ofisiál governu nian no funsionáriu sira hosi loja ai-funan lokál sira iha Dili hodi promove ai-funan lokál. Workshop ne'e hanesan parte ida husi atividade "Projetu ba Hadi'a Nutrisaun Labarik nian liuhosi Hadi'a Feto nia Meius Subsisténsia" ne'ebé implementa husi PARCIC ho fundu husi Governu Japaun.

Iha Timor-Leste, taxa pobreza partikularmente aas iha área foho sira, no taxa raes-badak entre labarik tinan lima mai kraik mós aas iha área hanesan. Maski esforsu atu hasa'e koñesimentu kona-ba nutrisaun habelar daudaun ona iha Timor-Leste, inan sira iha difikuldade atu aplika koñesimentu no te'in ai-han nutritivu iha sira-nia uma tanba sira laiha oportunidade atu hetan rendimentu suficiente hodi sosa ingrediente nutritivu.

Atu responde ba dezafiu hirak-ne'e, projetu ida-ne'e hakarak hadi'a nutrisaun uma-kain nian iha munisípiu tolu, hanesan Aileu, Ainaro no Ermera, liuhosi introdús florikultura ba feto sira. Ida-ne'e sei aumenta sira nia rendimentu no permite sira atu sosa ai-han ne'ebé nutritivu. Adisionalmente, projetu ne'e promove fahe koñesimentu kona-bá oinsá atu tein hahán nutritivu entre feto rural sira.

Ba tinan ida-ne'e, objetivu husi projetu ida-ne'e maka atu hetan produsaun no vendas iha dalan loos. Workshop ne'e realiza atu promove ai-funan lokál sira hodi oferese esperiénsia direita kona-ba arranju ai-funan Japaun nian, IKEBANA, arte subtrasaun nian, ne'ebé asentua ai-funan nia furak rasik. IKEBANA maka orijen tradisaun Japaun nian ne'ebé estabelecida iha serka tinan 600 liubá no ema sira hosi mundu tomak gosta.

【REMATA】